

摘藻堂四庫全書薈要

集部

欽定四庫全書薈要

集部

宋詩鈔卷九十七

九



欽定四庫全書薈要卷二萬三百五十

集部

宋詩鈔卷九十七

內閣中書舍人吳之振編

戴昺農歌集鈔

昺字景明號東埜石屏之從孫嘉定己卯登第授

贛州法曹叅軍有東埜農歌集石屏稱其不學晚唐
體曾聞大雅音者也集中答妄論宋唐詩體者云安
用雕鏤嘔肺腸辭能達意即文章性情元自無今古

格調何須辨宋唐人道鳳簫諧律呂誰知牛鐸有宮
商少陵甘作村夫子不害光芒萬丈長知此可與言
詩矣

侍屏翁遊屏山分得水字

攜琴入空山修竹翠相倚一曲千古心泠泠寄流水拂
雲卧白石冥搜契玄理有時采薪人歌聲隔林起

秋日過屏山菴

淒切抱葉蟬閒關棲樹禽入山本避喧復愛聆此音微

颼動夕爽薄雲散秋陰衆籟聞以靜片月生東林

逐瘧鬼

咄哉瘧鬼何冥愚沉魄猶滯江流居孰云胄出高陽氏
而乃不肖如此歟為妖常闕秋令動作威又竊炎官餘
今年恣睢逞暴虐十戶九室聞嗟吁人生一歲一寒暑
自有大瘧纏其軀翻手為涼覆手暖笑爾禍福纔須臾
癡兒騃女或汝怖那能嚇我烈丈夫汝不記少陵詩句
有神語子璋髑髏血模糊昌黎譴逐更多術灌毒炷艾

揮靈符今來古往共憎疾奈何長惡終不渝胡不學鮫
人細織冰綃製雲裾胡不從湘君緩移桂櫂寒芙蓉乃
甘卑溲賈衆怨厭襁唾罵無時無爾來經旬瞰吾室再
三謝遣猶踟躕吾詩吾酒既不廢汝窮汝技將何如大
江秋色正瀟灑明月皎皎風疎疎便須悟悔速歸去嘯
倚呼侶相嬉娛夜闌吟徹欲就睡燈花照眼團如珠夢
回病思甚然散颯颯風籟生庭梧

辛亥九日被檄視潞遂爽同官飲菊之約夜宿荒

驛風雨達曙

孤負重陽菊愁懷不肯寬郵亭一夜雨客枕五更寒脚
健從渠老心低到處安獨行誰可語時把古詩看

納涼即事

炎蒸欣傍晚埽地坐寬涼入竹風逾冷生荷水亦香蟻
行緣食几螢照落書牀聽得農人語今年稻穗長

偕兄侍屏翁探梅屏山分得空字

踏破登山屐來尋傍水叢眼明千樹底春在數花中格

瘦詩難寫香寒酒易空
狂歌歸秉燭驚怪走兒童

安居

安居元自好春晝更遲遲
雪涌煎茶鼎雲生浴硯池
栽荷填廢沼移竹補疎籬
猶有閒光景欹眠續舊詩

次韻屏翁新秋

檢點新秋事天公賜已豐
秋牀梧葉雨曉袂竹林風
閱世心先老傷時酒易中
誰將和戰議細與問元戎

己亥十月晦大雷雨

舛令頻年見憂時百慮灰
入冬常苦雨昨夜又轟雷
土爛麥難種蟲傷菜失栽
兒童不解事喜報海棠開

次韻屏翁冬日

曉起衝寒出霜明日未晞
麥豐來歲本梅漏早春機
水涸魚深隱蜜成蜂倦飛
靜中叅物理一一見精微

自武林還家由剡中

一筇雙不借役役又東還
野渡淺深水夕陽高下山
光陰虛我老造物靳人閒
高躅思吾祖鳴琴獨閉關

次韻君玉弟春事

海棠紅未了又近牡丹時送日多忙事
疇春欠好詩暖風催麥早晴晷轉花遲
不盡清遊興重為上巳期

次韻晚春二首

一襟塵欲滿刮眼得新詩風絮遺春恨
煙花隔歲期筍抽蟲半蝕櫻熟鳥先窺
光景渾如此心閒即好時

田園深有趣已分隱柴局老去情多感
春來夢少靈游絲捲晴日飛絮入空庭
預識今年好啼鶻枕上聽

春晚即事

春郊農務急野岸水痕高蒲渚鳴姑惡桑林嘒伯勞
整欄扶芍藥塞網護櫻桃不改窮居樂何妨見二毛

次韻屏翁初夏會芳小集

一觴還一咏竟日醉難成坐石驚雲濕臨池愛水平
密林宜午蔭啼鳥尚春聲更有櫻桃約明朝且願晴

夏初郊行

晴雨天難測寒暄氣未齊連村多綠樹終日嘒黃鸝
田

水衝塍斷山雲著地低偶隨農叟語不覺過橋西

僻居

地僻塵囂遠身閒趣味深清池涵竹色老樹帶藤陰引
鶴隨閒步招蟬伴醉吟有時燃古鼎隱几自觀心

亦龍弟覆簣累石作亭其陰屏翁名曰野亭索詩
謾賦

高懷抗塵外林杪著三間綠遶村邊樹青浮海上山目
窮天變化心靜地寬閒鷗鳥知人樂忘機亦往還

秋晚

西風澄曉氣凝觀
愜幽情草潤蛩聲滑
松涼鶴夢清吟
懷依水靜病思得秋輕
忽憶登高近循籬看菊英

鄭安道終歲相聚臨別以詩見貽次韻為謝

解把詩言別那無計可留
梅花兩心事寒雁五更愁
我亦高懸榻君須獨卧樓
後回相憶處莫返雪中舟

夏曼卿作新樓扁曰瀟湘
片景來求拙畫且索詩
有此一樓足悠然萬慮忘
拓開風月地壓斷水雲鄉
四

野留春色千峰明夕陽眼前無限景何處認瀟湘

幽棲

幽棲頗喜隔囂喧無客柴門盡日關汲水灌花私雨露
臨池疊石幻溪山四時有景常能好一世無人放得閒
清坐小亭觀衆妙數聲黃鳥綠陰間

此生

此生畢竟已蹉跎有酒何妨醉且歌人世盡緣愁得老
春花偏被雨相魔草欺蘭瘦能香否杏花殘奈俗何

試上東樓看霽景海山無數列青螺

書房

書房清曉焚香坐轉覺幽棲趣味真怪石一根雲態度
早梅半樹雪精神池魚自樂誰知我林鳥相忘不避人
得喪由來天自定莫將閒慮惱閒身

移古梅植于貯清之側已有生意喜而賦之

剝盡皮毛真實在幾年孤立小溪潄人來人去誰青眼
花落花開自苦心不是野夫同臭味難教君子出山林

巡簷日日窺生意一朵先春直萬金

再得古梅小而益怪首蒙屏翁品題次韻

愛渠怪怪復奇奇冒雪遙憑健步移
竹外池邊栽恰好山巔水際夢多時
百年死質餘生意一片孤槎帶好枝
寄語花神勤守護品題莫負老僊詩

觀敗碁者戲作

看人出着笑人低及至當枰却自迷
角子僅全輸了腹東邊纔活喪於西
欲裝劫去多難補待算征來恰又提

天下未應無妙手勸君莫愛墨後猊

閒居幽事

閒居幽事屬田園何必山林始避喧足水旱禾分母子
多年脩竹見翁孫欣然勝敗無心奕兀爾醉醒隨意樽
昨夜一番雷雨過綠波微漲曲池痕

己亥九日屏翁約諸孫登高西嶼阻風舟行不前
遂會於吾家山海圖之上酒邊翁有詩留題因

次韻

良辰樂事兩相關喜我樓臺便往還不用移舟過西嶼
只消把酒對南山風於破帽如先約菊為新萵欲笑顏
留作千年佳話處詩翁醉墨照楣間

秋日獨倚東樓

重陽過了秋逾爽自豁樓窗眺晚西野水倒涵天影動
海雲平壓雁行低興來頻放深杯飲吟到須還大字題
近喜書房添一寶陶泓買得古端溪

次韻屏翁壬寅九日再題小樓

佳節相過共舉觴為萸菊醉亦何妨須知我輩襟懷事
不是時人酒肉狂落雁影邊寒水碧歸鴉啼處夕陽黃
詩人樽俎風流在老氣橫吞年少場

初冬梅花偷放頗盛

清樽纔了黃花債又被梅花惱殺人妝點南枝無數雪
探支東帝幾分春精神全向疎中足標格端於瘦處真
徹夜苦吟無好語夢隨雙月步溪湄

四月即景

茶歌纔了又田歌節物真成一鳥過蒼竹颭風涼意足
碧梧留雨夜聲多瓜緣茅屋抽長蔓藕過蔬畦出矮荷
最喜白鷗相狎久對人自在浴清波

次韻鄭安道懷君玉弟游東嘉

好山好水東嘉郡兩月清游樂可知遠想池塘頻夢汝
還當風雨對眠誰別時菊蕊方宜酒幾日梅花已索詩
雁影參差霜正冷寄言歸計莫遲遲

春事

春事關心常早起愛看景物試凭欄戲魚池面微添綠
啼鳥枝頭尚帶寒斬棘重樊新挿柳斟泉頻灌自我蘭
年來賸有園林興每恨廬邊地不寬

賞茶

自汲香泉帶落花漫燒石鼎試新茶綠陰天氣閒庭院
卧聽黃蜂報晚衙

夜過鑑湖

推篷四望水連空一片蒲帆正飽風山際白雲雲際月

子規聲在白雲中

喜小兒學步

對周尚有六十日舉足已能三五移世路只今巖嶮甚
須教步步着平夷

夏晝小雨

小牀蘄簟展琉璃窗外新篁一尺圍正午雲橋疎雨過
冬青花上蜜蜂歸

里中小漁舟被差防江有感而賦

着身平地更多憂一棹思為泛宅謀昨夜西風邊報急
防江也要釣魚舟

天台道上早行

篋輿軋軋過清溪溪上梅花壓水低月影漸收天半曉
兩山相對竹鷄啼

五禽言

提葫蘆沽美酒人世光陰春電走一日得醉一日閒綠
髻幾曾俱白首沽酒沽酒有酒沽生前不飲真愚夫

不如歸去不如歸去千山萬水家鄉路今年又負故園
花來歲花開定歸否歸去歸去須早歸近日江湖非舊
時

泥滑滑泥滑滑客路迢迢雨不歇我僕十步九步蹶我
馬驢驢如跛鼃泥滑泥滑君莫愁秧爛麥損尤堪憂

脫却破袴脫却破袴蠶熟綠成霜雪縷小姑織絹未落
機縣家火急催官賦輸了官賦無零落破袴破袴還更
着

麥熟鍛磨麥熟鍛磨村南村北聲相和大男小女總欣
欣煮餅蒸糜任渠做鍛磨鍛磨莫等閒去年糠粃無得餐
小畦

小畦尋丈許鑿壁置柴扉雨後菜蟲死秋來花蝶稀
插籬新種菊抱甕已忘機俗客忽相訪妨人洗布衣

有感

浩浩海風勁滔滔河水渾古人皆去世喬木自當門
族黨諸孫盛吾宗一綫存興衰知有數心事與誰論

十日取野菊從酒

野徑菊仍好村壚酒亦嘉
未應今日蕊便是背時花
心在家千里身猶客九華
官程難久駐風雨暮山斜

山家小憩即景效藥名體

柴門通草徑茅屋桂枝間
脩竹連翹木高松續斷山
仰空青蔭密掃石綠花斑
傍澗牽牛飲白頭翁自閒

從板橋買舟上青陽

卸馬板橋西扁舟逆上溪
水鏤巖巖骨斷煙截樹頭
齊野

鴨驚人起村鷄上樹啼老農頭雪白猶自把鉏犁

抵池陽未入關泊於齊山數日因窮巖壑之勝山

有

翠微亭杜牧
之登高處

瘦策相扶上翠微眼驚奇怪足忘疲三十六洞猶昔者
四百餘年無牧之漲水森瀾春雨後遠山重疊夕陽時
幾多江北江南恨問着沙鷗總不知

秋暮出關即事

俗塵汨汨負清游重出城來已暮秋水洗柳根歌斷岸

霜摧蘆葉擁荒洲鄉音不到愁來雁野性無拘羨去鷗
可惜一堤明月好隔關難作夜深留

歸途過麻姑山

山行十里少人家客子貪程怕日斜倦坐松根需足力
輕風滿面落藤花

五松山太白祠堂

太白讀書之地詩有要迴長
舞袖盡耕五松山即此山也

艤舟來訪寶雲寺快上山頭尋五松捉月仙人呼不醒
一間老屋戰西風

歸途過銅官山

山徑崎嶇落葉黃青松疎處漏斜陽鳴禽無數聲相應
一陣微風野菊香

宋詩鈔卷九十七

欽定四庫全書薈要卷二萬三百五十一

集部

宋詩鈔卷九十八

內閣中書舍人吳之振編

鄭震清雋集鈔

震初名震後更名起字叔起號菊山閩人早年場屋不利棄舉業更讀書客京師三十餘年歷主於潛諸暨蕭山學晚為安定和靖書院堂長又開講於平江無錫伏闕論史嵩之淳祐丁未鄭清之再相震登其

門罵曰端平敗相何堪再壞天下被執與子女俱下獄
京尹趙與籌縱之鄭罷相乃免與林慮齋周伯弼為
行輩詩有倦遊稿仇山村選四十首為清雋集所南
作家傳云得詩十五篇此蓋流落交遊間者所南未
之見也

鄂州南樓

淳祐六年冬十月我來獨自上南樓曉霧江山都不見
霧收日出城東頭照見漢陽樹照見鸚鵡洲浪濤江漢

出岷峽洞庭雲夢天共流大船如龍捲寒碧小船如葉
飛洪溝湘靈霞珮跨黃鵠洞庭玉笛橫清秋沈寥突兀
不可狀開闔風雨晴煙浮空中一一都照見照見今來
古往絲粟無限愁夜郎逐客心膽大醉欲槌碎醒又休
此山此水長不老英雄消盡山水留何當大雪夜明月
摩挲老眼看九州春風吹雪變紅綿牛羊被野邊無憂

飲馬長城窟

飲馬長城窟下見征人骨長城窟雖深見骨不見心誰

知征人心怨殺秦至今北邊風打山草地荒漫漫五月
方見青七月霜便寒古來無井飲賁帶糧盡乾自從征
人掘此窟戍馬飲之如飛翰朝呷一口水暮破千重關
秦皇極是無道理長城萬里誰能比

樵歌三首

上山斫山山丁登下山嵌山山稜層秋殘日暮歸來晚
茅簷洗脚月又明明朝早入芙蓉城

入城不識公與卿行歌道上傍無人衣衫藍縷鶉百結

與妻索笑妻生嗔那知不是朱買臣

山拗築著牧牛兒白石鑿鑿蒙茸披繆公無人寧戚死
獨吹觥栗誰得知不如採樵同路歸

採桑曲

晴採桑雨採桑田頭陌上家家忙去年養蠶十分熟蠶
姑只著麻衣裳

天高高

天高高兮色青青夜沉沉兮星熒熒不知余命何所繫

分何星

送友人之淮

積得讀書身從教此道貧逢秋為遠客知已是何人天
下方多事西風至不仁但於登眺處杯酒莫辭頻

歸去好

歸去豈不好平田帶淺林春猿鳴雪澗晴日轉雲岑世
久無鳴犢時當學展禽吾生今老矣梁甫豈能吟

病後

漸嬾說功名修真喜道經淒涼秋聽雨空濶夜觀星有
病色先見無心夢最靈堦前風葉響還又感飄零

餘杭道上

五年茲路上頻往又頻還歲月孤松老風霜苦竹斑溪
流天目水雲出洞霄山馬上因閒眺蜉蝣宇宙間

餘杭界早發

早發促程期籃輿帶月低山中如白晝斗下渡清溪羣
動霜初落四鄰雞未啼惟聞兵遞鋪星急過淮西

喜靜

素來嫌僻靜今漸與相安師友凋零盡年時出處難春
風雙屐暖夜雨一燈寒洙泗曾顏輩何曾作好官

宿洞霄山中

入山時八月嵐氣似深冬巖洞生風雨窠巢落檜松山
中九重鎖月下一聲鐘警省非人世今秋得異逢

宿虎丘

到晚歸不去因而此宿休雲深千古寺月冷一天秋崖

裂池如束天虛壘欲浮最宜初日上高處看煙收

登荆南城樓

因為古荊州翻成一段愁孟嘉曾落帽王粲此登樓唐
鄧通襄路沱潛並漢流太平官府盛昔日欠來遊

再登南樓

客中重上倚層臺天濶雲收八面開鴈帶岳陽秋曉過
浪涵巴峽影西來諸營種柳今何在老子登樓得幾回
自是江山雄壯處興亡不必問寒灰

自黃山還途中作

屈指還京十日程每逢歇處問村名
春沙脈脈溪初漲夜雨垂垂曉又晴
山下有人傳虎出店中炊飯見牛鳴
天涯行客無寧日不及田家業在耕

卜居

久欲謀歸力不任浮雲蹤跡謾巢林
功名未入屠龍手貧賤常懷買鶴心
月下開門微雨過樓頭聞笛二更深
世間萬事俱陳迹空倚西風閱古今

爛柯山

春風萬古洞門開
塵世興亡是幾回
碁局至今無處覓
樵人於此遇仙來
飛梁橫跨丹虹影
絕頂平鋪白玉堆
天下紛紛無好著
斜陽下嶺共徘徊

荆南別賈制書東歸

來時秋雨滿江樓
歸日春風度客舟
回首荆南天一角
月明吹笛下揚州

送友人之鄂

湖海聲名落搢紳由江而鄂遡鱗鱗煩君黃鶴樓頭看
天下英雄賸幾人

晚春即事

輕寒時節牡丹開葉底青青又見梅門外數枝楊柳薄
一春鶯燕不曾來

荆江口望見君山

荆江江口望漫漫一白無邊夕照寒只是青雲浮水上
教人錯認作山看

虎丘尹和靖書院示開講

從前聽者少
是日聽者多

和靖書堂八面開新分半席在山隈若無人聽都歸去
傳語生公借石來

宋詩鈔卷九十八

欽定四庫全書薈要卷二萬三百五十二

集部

宋詩鈔卷九十九

內閣中書舍人吳之振編

謝翱晞髮集鈔

翱字皋羽，慕屈平，托遠遊，乃號晞髮子。福之，長溪人。文丞相開府延平，翱以布衣諮議參軍。天祥卒，亡匿所至，輒感哭，挾酒登浙江子陵釣臺，設天祥主亭。隅再拜號哭，以竹如意擊石，歌曰：「魂朝往兮何極，暮

歸來兮闕水黑化為朱鳥兮有味焉食歌畢竹石俱
碎詳西臺慟哭記欲為文冢瘞之臺南後往來杭睦
間與方韶卿鳳吳子善思齊等厚乙未以肺疾死囑
妻劉以文與骨授之方有許劒錄其會友之所名沙
社取晚而信也每執筆遐思身與天地俱忘語人曰
用志不分鬼神將避之古詩頡頏昌谷近體則卓鍊
沈着非長吉所及也

宋饒歌鼓吹曲

太祖嘗微時歌日出其後卒平僭亂證於日為日

離海第一

日離海青瞳矐沃以積水涵蒼穹神光隱豹霧空氣呼
吸為蛇龍赤雲衣紫霓從吹白衆宿歌大風天吳遁清
海宮

右日離海十四句句十二句句三字二句句四字

宋既受天命為下所推戴懲五季亂誓將整師秋
毫無所犯為天馬黃第二

天馬黃產異方龍為馬白照夜氣汗雲聲簞野備法衣
引宸駕騰天垠倏變化閏之餘劇以霸閱八姓瞬代謝
驅祥靈入罍獲皇上帝監于下誓無譁出既禡市日中
不易賈坐明堂朝諸夏賚萬方錫純嘏

右天馬黃二十六句句三字

宋既有天下李筠懷不軌據壺關以叛王師討平
之為征黎第三

黎之壅彌蒼莽迤壺關屬上黨有雄矯健曰餘宿將于

故之思泣示厥像倚孽狐勢方張辨臣獻議勸下太行
趨懷孟虎牢計之上爭洛邑以東鄉王師奄至扼其吭帝
授方畧中厥狀獸窮駭突死卒以煬脅從已逮孥肆放
凱歌回皇威暢

太行依吳棫讀
如輩行之行

右征黎二十六句句十四句句三字十一句句四字一
句句五字

上親征李重進至廣陵臨其城拔之為上臨墉第

四

上臨壙戈耀日赫韋指顧流電疾臯止其魁不及卒其
魁則頑曰予號日出坐于轅門斧以率歸子往諭泣股
栗語中其肝至畢述待不及屏沮回適鞠投于燎甘所
即皇仁閔下焉如字止蹕蹕貅徹竈歸數實獲其棘矢納
世室

右上臨壙二十四句句十二句句三字十一句句四字
一句句五字

湖湘亂命將拯之至江陵周保權已平賊出軍澧

南以拒卒取滅亡為軍澧南第五

軍澧南潰飛鳥鷹隼北來龍蛇夭矯帝有初命奉致討
臨於荆妖孽既掃急驅而孕雉入蒼莽以保王旅長馳
颯振槁以仁易暴戒擊剽惟荆衡及郴士如林磔其節
蚤蝨春葩秋陰我有造干南

尼心切

式敷德音

右軍澧南二十句句七句句三字九句句四字四句句
五字

王師拯湖湘道渚宮高繼沖懼出迎悉以其版籍

來上為隣之震第六

隣之震震于戶戒登陴徹守御神威奄至不及拒汧楚
以南菁茅宿莽獻于王吏奉厥土天子有詔侯西楚自
南北東皆我疆龍旗虎節拜降王秦戈鞏甲期韜藏冕
旒當中垂衣裳

右隣之震二十句十一句句三字九句句四字

蜀主景懼陰結太原獲其謀六師征之景至以母
託上許歸母數日景卒母以酒酹地因不食亦

卒為母思悲第七

母思悲母于歸母聞帝語妾歸無所妾生并土蜀野芒
芒奄失其疆初帝謂母子晁來小者侯大者王有瘼其
肌載粟于創畢有下土方歸母于鄉天不女奪朕言不
忘

右母思悲十六句句五句句三字十句句四字一句句
五字

劉鋹亂嶺南為象陳以拒王師象奔蹠反踐俘鋹

以獻為象之奔第八

象之奔斯惟跡蹶蹶魚麗駕空雲鳥潰南草浮浮順於
貔貅焚其帑實弃厥陬皇風播平瞽霽星辰起皆北走
唐季以來逆雛來味嶺海肅清無留後于汴獻囚凱歌
奏

右象之奔十八句八句句三字十句句四字

播協畢
后反走

奏音

上命將平南唐誓城陷毋得輒戮一人衆咸聽命

為征誓第九

帝命將臣誓師于征伯

同 禍

牙于庭曰無劉我人曲阿惟

唐以及豫章孽于南國楚粵是疆我師孔武聿禽其王

始怒頌頌將臣不懌曰如上命即起予疾弓韜于衣刃

以不血收其石程焚其侈淫視于丁寧箬羽不飲

平聲取

其罇磬

平聲

以獻于京于廟告成垓埏既平

右征誓二十四句句二十三句句四字一句句五字

錢氏奄有吳越朝會貢獻不絕于道至是以版圖

歸職方為版圖歸第十

版圖歸歸職方昔服跗注備戎行帝錫之旆龍鳥章酬
獻命與胥今上及秦王外臣拜稽首笑頷帝色康畢同
軌來於梁暕靈奕奕敷重光願止劒履覲帶裳四海臣
妾配虞唐

右版圖歸十八句句九句句三字五句句四字四句句
五字

陳洪進初隸南唐崎嶇得達于天子至是籍其國

封畧來獻為附庸畢第十一

清源無諸邦力弱臣秣陵間道遣進表九門望日旌願
齒鄒與鄉自達天子庭四隣彫霸業國除洗天兵皇靈
暢遐外蜚俗邇聲明歸其所隸州乞身奉朝請音青帝命
得陪祀湯沐在王城從茲附庸畢歌以頌河清

右附庸畢十六句句五字

太祖征河東班師以伐功遺太宗卒成其志為上

之回第十二

上之回舞干戚鳴鸞在鑣士飽力桴鼓轟騰罕山北餘
刃恢恢軍容肅穆王畿主辰參後服神繼聖伐功卒扼
以偏師斷北脅矢箛鳴房蜩集的質子援絕親銜璧并
俗嘖嘖附于化以安得其屈產歸帝閑重譯君長來稱
藩籥節儉樂示子孫

右上之回二十六句句十三句句三字十二句句四字
一句句五字

宋騎吹曲

親征曲第一

雲屯列竈驅貔貅殿前殺馬祭蚩尤
勾陳蒼蒼太白濕賊帳夢驚遶營日
軍呼萬歲摧太行華留東抹流電光
重華繼堯坐垂拱并土再駕無葛疆

回鑾曲第二

建隆親征回鑾二之一

徂暑黎陽車駕歸掃清氛翳兵更衣
江都朔雲車駕出凱歌消冰供尚食
都人引領望翠華征人一月俱還家

開寶親征回鑾二之二

長堤夜幸士素飽孤城沈竈無飛鳥從征鹵簿拜上恩
太常朝上回鑾表

太平興國回鑾二之三

都人望氣歸瑤闕星掃茸頭落參伐西人冉冉留紫雲
六飛擁日歌回軍

遣將曲第三

平荆湖遣將三之一

天門雷動開風雲內前盡給羽林軍聖人神武授方畧
斬將奪旗各駿奔王師所過如時雨洗濯焦枯嚮荆楚
重宣德意吊遺黎素服軍前釋俘虜全家到闕拜上恩
詔書為築先臣墓

下劔門遣將三之二

神風流霆驅偃草天兵夜下西南道虎賁長戟來鳳州
歸峽銜枚疾如掃廟謨萬里諗諸將山川曲折圖形狀
天同鬼授契若符坐減衆愚虜供帳歸來論功授節鎮

鐃鼓殿前歌破陣

歸朝曲第四

南平王歸朝四之一

荆南萬里朝天道
巫女雲荒產芳草
錦韉道賜帶盤鵬
方物南來進龍腦
願陪郊祀依日光
供帳歸朝親奉表
勲階邑食及隸人
移鎮徐戎作家廟
人生富貴侯與王
四海為家皆故鄉

吳越王妃歸朝四之二

句吳月令牽牛中

妃以開寶九年三月隨王入朝

翟茀乘風來閔宮隨

王劔履朝上殿黃門夜趨長春宴昭容引班入內朝龍
袞當中開雉扇宴罷朝辭生局促詔賜離宮作湯沐先
王丞嘗澤有差上恩許歌陌上花

諭歸朝曲第五

淮南草濕網蟲露家在先朝父尚主真人御極四海歸
偃蹇不朝稱節度夜持鐵券為爾賜上恩特遣儀鑾使
神離魄奪取族夷功臣效命錫龍旂

李侍中妾歌第六

李筠愛將唯儋珪美人姓劉筠侍兒城危搶撥不得力
雨損鉛華帳下啼擁髻前言馬有幾猶說閨中郵問此
赤龍從東乘日車火繞城門內蛇死英雄際會風雲奔
婦人思報羅裳恩

孟蜀李夫人詞第七

春荒曲薄蠶叢土屈狄歸朝辭廟主官家呼母恩許歸
劒閣并門無處所

一作淚如雨

故衣升屋棺四繞出門哭子

汴州道回腸酹酒三致辭巴蜀如歸化啼鳥老身不食
追爾魂鹵簿臨門拜上恩

南唐奉使曲第八

孤城圍中拜右史侍書猶對重瞳子請行慷慨期緩師
奉命日馳三百里河流遡風車北首便殿蒙恩引天袖
臣肝有血不濺衣寸舌欲存建王後奇胸如江湧崔嵬
慟哭不得天顏回

伎女洗藍曲第九

後庭朱黃作衣裏伎女帳帷青曳地碧綠夜挂寒不收
緣此洗藍渟露水外間學染因得名不省歸朝為國氏
他年寄生產鷓尾空憶宮中烏銜子

卹吏謁故主曲第十

嶺南使鶴日教戰巫女才人謔相見南撓欲載遠遊冠
衛士盜船去不還夢見隨俘上江卹道謁淒涼惟故吏
自言置卹本先王方物入朝緣此至聞言含咽涕灑江
沉乃園人舊姓龐淚辭嶺海無歸處蒙恩祇向江陵住

烏栖曲擬張司業

吳宮草深四五月破楚門開烏啼歇美人軍裝多在船
歸來把弓墮弓弦越羅如粟越王獻宮中養蠶不作線
輓轡出屋井水淺樹花萎子如繭烏栖烏啼宮燭秋
越女入宮吳女愁

廢居行

海濤翻空秋草短白蛇入窠啗雀卵經年廢屋無居人
孕婦夜向船中產歸來多雨回生魚穴蟲祝子滿戶樞

隣家置屋供官役買得沂王園令宅

古釵歎

刑徒鬼火去飄忽息婦堆前殯齊發白烟淚濕樵叟來
拾得慈獻陵中髮青長七尺光照地髮下宛轉金釵二
持歸薰沐置高堂包裹恐為神所將妻兒朝拜復莫拜
冉冉臥病不得瘥省知天物厭凡庸夜送白龍潭水中
叩頭却顧祈免死永入幽宮伴龍子

遠遊篇寄府教景熙

朝遊扶桑根不折拂日枝莫食楚萍實掬海見虹霓黃
鵠別我影目盡漢水湄況復銜其子風露何當歸飄蕭
軟桂叢零落紫苔衣夢魂知爾處落羽在瑤池

瓊花引

后土祠前車馬道天人種花無瑤草英雲蓋珠欲上天
夜半黃門催進表酒香浮春露泥泥二十四橋色如洗
陰風吹雪月墮地幾人不得揚州死孤貞抱一不再識
夜歸閨風曉無蹟蒼苔染根烟雨泣歲久遊魂化為碧

秋日擬塞上曲

落日燉煌北妖星太白西涼風吹沙磧帳下玉人啼吹
沙復吹草嘶馬未知道醉後聞塔鈴霜天忽如掃野駝
尋水向月行露下羣兒食秋棗

故園秋日曲四首

空園久閉無人住城烏應入巢其樹食盡滿園綠荔枝
引雛飛去人始知

茅茨竹外烟火青杉鷄啁哳向田鳴家家紅鹽殷新杵

綠樹裏創子如雨

龍蛇已去荒窟宅翻藕人人下劒池岸池藕盡無浮葉
惟有青青榕樹枝

粵王山下霧如雨吹入羅襟楚女啼身逐千艘落南去
惟有檣鳥飛向西

咄咄復咄咄

咄咄復咄咄野風吹雲起草垓竹塵陰陰不見山鷄飛
上樹海沒鷗人間舊事新白頭淮南小兒未識愁淮南

老翁叫無力瓦盆盛水看日食

賦得建業水

建業水秋風動揚子魚龍夜落星斗南潮沒潮生蒼鶻
起他年冠蓋物具美風吹小船入城市潮去不來風日
死白浪黃塵烟霧裏中有長魚食鱸鮓解后食魚何處
是西上國門望武昌風雨徙魚來漢陽武昌魚勞聚寒
慘太白八月魚腦減武昌城頭鼓統統

賦得北府酒

北府酒吹濕宮城柳柳枝著地春垂垂祇管人間新別
離離情欲斷江水語女兒連臂歌白紵淮南神仙來酒
坊甲馬獵獵羽林郎百年風物烟塵蒼老兵對月猶舉
觴青帘淚濕女牆下曾識行軍舊司馬

飛仙引遊沃州水簾谷作

赤城後門桃花尾濕浸蘼蕪洗蒼耳小支菩提海上來
天風吹下谷簾水斜珠界左轉復右華蓋縣肝三葉紫
內間肉芝承乳流鬼母仙姝臨洗胃蒼龜守闕朝太微

色阻讒神誣奏事海桑男子在謫籍驅鹿行車閨年至
島上曲二首

皮帶墨鱗身卉衣晚隨鬼渡水燈微石門犬吠聞人語
知在海南種蛤歸

夫招賈客歲經遼自到城中賣織綃卻買鉛華采珠母
檳榔露下月中調

花卿冢行

山谷云花卿冢在丹陵之東館鎮至今猶有英氣血

食其鄉

濕雲糝糊埋秋空雨青沙白丹陵東莓苔陰陰草茸茸
上聲云是花卿古來冢花卿舊事人所知花卿古冢知者
誰精靈未歸白日西廟鴉啄肉枝上啼緜州拓黃魂正
飛

和靖墓

山中處士白麻履死後無書獻天子青童玄鶴晝上天
夜下玉棺葬湖水湖堤四合封如髮芳樹玲瓏倚春雪

百年鳳舞雲霧空玉腕人間出句越宮嵐塔雨恍如失
飛網繞湖冠聚鷗琳宇焚芝秋寂歷斗下無人祠太乙
送人歸烏傷

湖邊老屋牆壓籬饑鴉啄雪枝上啼湖中葑田產菰米
菖蒲花開照湖水蒺藜老翁呼不起曾入東宮教皇子
文雅風流俱掃地瓦磚擲人老兵醉後園小坊近市廛
借人撈蒲無稅錢君歸故里何所憐

句章見月食

穀州見月如魚口沫聚痕消暗窗牖鄞城見月如破臼
弃藥含垢掛南斗龍蛇伏氣諸腦空水中睡失羣陰母
其間海禽獨夜啼黑雲赴海同奔犀市人識母不識父
擊柝推扉救月死況值蕤賓月十五千神附甲支在子
孤子哀吟離楚尾泪落荒江吊南紀猶憶秦淮哭日年
不敢仰視看盆水

逃暑崇法寺

城南古寺涼生處草色遙連孝子墓
碁局雨生苔蘚文

絮梁晴掛芭蕉樹自昔閣黎修白業會公唯與舒王接
只今塵土影堂空石上猶鐫麻紙帖

夏日遊玉几山中

曳舟來山中出郭稅吾駕獨慕欣衆勝晨發乃及夜豈
無城中山愛此足幽野橫陳玉几峯隱護碧殿瓦并州
古男子禮塔於此舍而我飲水人猶為內熱者擬攜桃
枝笙舒卷得餉暇明席織海草因之一枕藉冷風吹雪
空相與坐其下

觀水

積陰生壑雨野水學江流對屋見燈火相望南渡頭浮
槎到高樹白黿起滄洲變怪若不測神功安能尤稍退
見涯涘及來痕沫收崩濤出白石隱隱如博投水楊洗
荒根素髮生古愁見此倏若化故流還膠舟荒源不可
詰欲盡山雲求

池上萍

浮萍隨漲水上到荷葉端水退不得下猶粘花萼間花

殷青已見葉翠枯始斑何如根在水根蒂相團團人生
慕高遠風雲事躋攀絕髯尚號叫化為鶴與猿幸未及
枯槁萬里吾當還

贈寫照唐子良

吳中衆史今代畫不獨畫人兼畫馬唐生家住金華雲
對予獨肯畫古人夕陽西下東流水紛紛古人呼不起
東都留守吳中豪王府勲僚舊俊髦當時氣薄陰山日
勾陳蒼蒼太白高百年水竭海塵上誰見淩烟拂蛛網

霜髯磔磔開清新彷彿猶帶黃河水忽疑稍會怒色止或
可從傍窺諫紙唐生見我淚如洗頗憶古人今不死俟我
氣定神始閒命筆更起唐衣冠

九日

秋風颯以至今日重陽日眼明對南山尚想陶彭澤向
來建威幕頗見有此客驅車不小留駕言公田秫一朝
又棄去此意誰能識寄奴趣殊禮風旨來自北只今王
江州建國功第一故是何珉孫舉動良足惜飲愧望柴

桑稍以自漙滌殷勤白衣餉猶恐不我即中路候籃輿
要致已甚迫葛巾赤兩腳頽然向林宅此翁本坦蕩焉
能苦違物雖然可計取中實未易屈華軒又何羨自載
返蓬葦終身書甲子往往義形色如使磷與緇安得為
玉雪籬邊菊弄黃粲粲正堪摘我方持空觴千載高風
激

雜言送鄭主簿炎之官昌化

鄭嘗兩請福州文解皆為詞賦第一

劉先生名肩吾閩中詞賦天下無當年戰藝誇顏色進
士出身兩回得盧公里人正在朝相見相逢九官宅余
時猶弱起慨恍謂此未足榮其鄉丈夫事業在簡冊要
令姓字留耿光繼聞鄭君年最少人物氣象尤堂堂白
鹿山南介公後禽蛟兩祭獅子王夢魂欲見無由據側
荔芭蕉春復暮時移乃爾來雲間因作廣文求主簿顧
予多病澁語言面垢毛焦著麻布山中乞食城中歸徵
詩送贈非所宜已聞之戍嚮昌化此地人傳多畏怕龍

居嗜燕烟入巢病甲垂攔腥雨下又聞山鬼吹燈夜來
向人家避官舍君持何術徑往居此無百憂便將天雷
斧柄塞鬼穴巫山鐵鎖沈龍湫祇足自亂不得休豈知
從心致禱動幽隱使龍無嗜鬼無愁不知君能致此不
龍不須酌以酒鬼不須祭以肉秋旗卷雨曉案烟時向
縣齋望天目

一作龍不
須鍼以從

擬古

翔鱗化海鳧不見腦中石人生弃井邑寄處終為客常

懷墳墓思永夜良跼踖秋風吹蓬顆絮絮如布奕上為
考與曾下為叔與伯豈無故鬼悲翻念遠行役服藥得
神仙去後唯留跡忽夢南遊雲相逐孤飛翮

五日山中

東隣拔蒲根南隣燒艾葉艾葉出青烟蒲根香勝雪乾
坤生燐火陰碧期月光烟隨艾葉散進此菖蒲觴蒲觴
益齒髮齒白髮如漆餘飲不盡器置之五七日五日化
為丹七日化為碧一服一千年令人生羽翼

鐵如意

仙客五六人月下鬪婆娑散影若雲霧遺音杳江河其
一起楚舞一起作楚歌雙執鐵如意擊碎珊瑚柯一人
奪執之睨者一人過更舞又一人相向屢傴僂一人獨
撫掌身挂青薜蘿夜長天籟絕宛轉愁奈何

萍間搦荷效王司馬體

初萍半含絮頃刻開數畝荷生浮其間風雨足解后百
年遊子心欲作千歲久昔為浮萍根今為搦荷藕荷高

刺已生魚遊觸其首離離荷下萍吹向白魚口

效孟郊體

閒庭生栢影荇藻交行路忽忽如有人起視不見處牽
牛秋正中海白夜疑曙野風吹空巢波濤在孤樹

落葉昔日雨地上僅可數今雨落葉處可數還在樹不
愁繞樹飛愁有空枝垂天涯風雨心雜佩光陸離感此
畢宇宙涕零無所之寒花飄夕暉美人啼秋衣不染根
與髮良藥空爾為

閨中玻瓈盆貯水看落月看月復看日日月從此出愛
此日與月傾寫入妾懷疑此一掬水中涵濟與淮淚落
水中影見妾頭上釵

近體二首

南雁去來盡音書不可憑應過蠻嶺瘴聞拊楚臣膺滄
海沉秦壁愁雲起舜陵可堪魂夢在回首舊觚稜
月離孤嶂雨尋夢下山川野塚埋鸚鵡殘碑哭杜鵑妓
叔中使客民買內醫田到此聞隣笛離情重惘然

憶梁禮部椅

閒庭芳桂叢相憶
曙雲空文字能娛老
莓苔此興同青
山明月下家口少
微東歲晚西莊路
柴門語自工

拜玄英先生畫像

來此得公真
塵埃避隱淪
水生溪榜夕
苔臥野衣
春雨
冢侵吳甸荒
祠侑漢人
微嗟值衰世
為爾獨傷神

送汪十

多年隱賣漿
此去結山房
掃菌侵花落
種松如草長
老

期秋欲至負味水初嘗歲晚逢樵獵音書定不忘

悼南上人

翻經卷未終聞打寂時鐘盡說他身在唯應外國逢錫
聲歸後夜琴意滿諸峯憶昨夜禪處湖雲起白龍

元日讀老子望瀑作

空山無轍迹懸水下分洪醉醒聽猶在寒暄色不同異
書天姥秘靈物乳池空祇憶殘年雨先流到海中

哭所知

總戎臨百粵花鳥瘴江村落日失滄海寒風上薊門雨
青餘化碧林黑見歸魂欲哭山陽笛隣人亦不存

呈王尚書應麟

寒風吹鬢影客淚濕衣塵千里見積水滿城無故人船
歌甌雪盡劒舞越花新獨憶絲綸老相從話所親

山陰道中呈鄭正樸翁

楊柳遠天色野風來水涯異鄉同夢客今雨故人家越
樹夜啼鳥禹陵冬落花悠悠湖海意為爾鬢先華

送毛耳翁之湘南

湘草碧於水王孫尚此留
一身行萬里雙鬢集諸愁
月落嶽雲曙龍逃海雨秋
可能無事業相見竟悠悠

寒食姑蘇道中

頻年感烟草荒塚幾人耕
吳楚逢寒食山村見獨行
天陰月不死江晚汐徐生
到海征帆影悠悠識此情

別子靜却送之雪

獨往知吾事語離何所求
故家無別業殘夢下扁舟
積

葉吳宮冷啗猿顧渚秋那能不相待羈旅負清遊

八詠樓

江山此愁絕寒角夢中吹飛鳥過帆影遊塵空戟枝水
交明月動槎汎故洲移已薄齊梁士猶吟沈約詩

至日憶山中客

山村雲物外至朔閏年愁獨客語茅屋樵人共白頭驛
花殘楚水烽火到交州欲隱裂裳帛春來重結裘

懷峨嵋家先生

露下濕百草病思生積愁窟泉春洗屐
雪莫過樓魂夢來巴峽衣冠老代州
平生仗忠信心自與身仇

哭廣信謝公

自爾逃名姓終喪哭水濱海僧疑見貌
山鬼舊為隣客死留衣物囊空出告身
他年越鄉值賣卜有斯人

雨夜呈韶卿

相看隴水雲一夕幾回分預恐今宵雨
他年獨自聞野花同楚越江靄雜朝曛
不得鋤芝朮逢樵却寄君

暮春感興

天涯芳草夢此意未應泯
獨對風烟老虛為江海人
漁樵分落日櫻笋過殘春
舉世無知己他生應逐臣

秋日憶過秦國公主園

野影林樾盡山昏瓦塔齊
涼宵風雨過一雁西南啼
嵐霧洗巾帨井泉生蒺藜
傷心拂塵塵衣淚濕空綈

用韻酬友人憶寄

麻衣拂市塵外事不干貧
野氣生寒井天陰壓暮春
間

身分楚鞠白髮作吳人已斲靡蕪徑青鞋憶寄頻

鼓子花

塵濕西風淚溝西影見君碧衣羞遠日天夢冷秋雲蔓
引山精徑籬依楚女墳海邊逢賣藥采實故應分

山寺送翁景芳歸覲

弱雲竹水湄葉影碧離離野別如秋夢他宵獨爾思林
殘西域果鐘動下方棋可得朝還莫相看長在茲

寄朱仁中

聞君經亂後居處畏山顛家在聚如客糧餘食帶烟戍
鴉分落日燒草共殘年因憶先丘壠于今是極邊

西臺哭所思

殘年哭知己白日下荒臺淚落吳江水隨潮到海迴故
衣猶染碧后土不憐才未老山中客唯應賦八哀

槿樹

白犬吠行人西風杵臼新洗香澄宿水曝髮向秋隣野
草依溝盡宮花入帽頻人家小門徑憐爾獨相親

哭肖齋李先生

落日夢江海呼天野水涯百年惟此死孤劍託全家
血染楚花碧魂歸蜀日斜能令感恩者狼籍慰荒遐

遊釣臺

百臺臨釣渚遺像在蒼烟有客隨槎到無僧依樹禪
風塵侵祭器樵獵避兵船應有前朝蹟看碑數漢年

過孫君文舊避地處

相逢還自矢相見盡天涯隣壤初移戍空山此寄家
剪

茸春過鹿伐竹舊燒畬去後餘荒槿依溝結影斜

韶卿住烏傷寄劉元益

他日憶逢君林中訪惠勤鹿麋行處見流水別時
聞草沒秦人塚山通越國雲音書年歲失莫訝白
鷗羣

魯國圖詩并序

翺嘗乘舟至鄞望海上島無數其民多卉服過蛟門
登候潮山被髮楚歌歌罷輟復哭思夫子浮海居夷

之義至定海學故石刻盡仆泥淖中新刻復闌茸讀
即怏怏乃汲水洗故刻得紹興間邑令趙所傳魯圖
自云齊梁父諸山川至洙泗間巷里廟社并墓歷歷
如指諸掌遂摹其本歸過浦汭方君景山與括人吳
思齊率其徒為講經社得思陵所贊夫子像揭于庭
朔望拜進退興俯殊習乞翺所摹圖與像對翺喜而
歸之且書其後為之詩曰

秋風嶽下城海客見圖新樹入舞雩里水來浮磬濱東

封餘輦路西狩問虞人被髮逢夫子狂歌作放民

萬松道中望南太白

笋輿行萬山中有十里亭老樹祇一色野公逾百齡
柴關當太白藥氣近樵青岡草粘枯翼巢枝落退翎
期探幽谷水共斲松根苓艾納下天雨塵風吹冥冥

峨眉老人別子歌

峨眉有老人奉命過嵩少天風吹西翼冉冉明夕照
濕塵紛墮天髮白更待報有子為異物不得入家廟
慟哭

東南雲相望滄海嶠青鳥年年來寄書久不到

後瓊花引

揚州城門夜宿雪揚州城中哭明月墮枝濕雲故鬼語
西來陰風無健鶻神娥慙空衆芳歇一夕蒼苔變華髮
宮花窄簾塵掩韞玉華無因進吳越離離淮水山央央
誰其死者李與姜

邳州哭

邳州哭井水竭去年哭母瘡海熱今年此日來邳州母

死未禪子為囚邳州土濕淚長在化為蒼苔色不改兩
兩遊魂歸瘴海

秋風海上曲

秋風吹水龍上天龍女抱珠海底眠水花生雲起如葑
神龍下宿藕絲孔巨鼈鼉黿鼉鼓隨赤魚鱗鬣陳旌旗
海人見此失操網歸對妻兒月下紡自言移家來磧中
十載秋風潮不上老夫一人語門前見此已是開皇年

古別離

仙人別母母哭啼遺以神藥乃醉之醒來哭定記兒語
食此庭前雙橘樹葉能禦饑病能愈豈似當時逐兒去
隣翁有女立我前取刀剖腹爾勿憐但爾嫁夫能治田
生子不願生神仙

冬青樹引別玉潛

冬青樹山南陸九日靈禽居上枝知君種年星在尾根
到九泉護龍髓恒星晝竇夜不見七度山南與鬼戰願
君此心無所移此樹終有開花時山南金粟見離離白

衣人拜樹下起靈禽啄栗枝上飛

小元祐歌寄劉君鼎

前甲子小元祐句章祿黑權臣死端平天子初改紀龔
芳泰陵種蘭芷當秋淮甸枯草黃彎弧北向射天狼弧
南星光天狗墮入蔡生擒完顏王是年南海無波浪月
濕珠胎君以降只今六十空白頭獨騎麒麟補春秋天
回星周美惡復人世更傳蔡州錄

雨飲玲瓏巖下

山居起嶽嵌衣被松與桂夜含星斗光隱若金石氣雨
來輒阻之不得撫蒼翠下有桑門子飲用陶匏器盆中
蓄海石左顧如牡礪疑此磧上來不知幾年歲桑門却
問客所居何姓氏回指南海峯蒼茫倘一至

翠鑱亭避雨

亭有魏王妃所題字尚新王嘗以皇子成德軍節度使鎮明故犯至其處

客有遊山衣著久如薜荔行行萬翠亭忽作風雨憇仰
面無所覩梁間有題字問此何人書婉婉有弱氣云昔
魏王妃學書似李衛乘雲到此山洒墨在空翠塵風吹

土花倏忽景物異疑此夢與仙不類人間世

過舒臨海故宅

破壁濕海蘚水邊日氣蒸云是舒公宅其孫艾且仁昔
公初作尉視事即斬人上書稱臣亶待罪滄海濱天子
有詔至汝亶可治民爾時荆文公上方邑之鄞聞此輒
異之久會公秉鈞謂此非狂狷引用至中丞立朝思蹇
諤庶以報君親蘇公下詔獄讒者用事新於此與有力
豈為重其身晴風吹海雨山川尚橫陳俯仰勿太息徒

為驚爾隣

有洗舊誥綾作青色鬻將以為緣以紺繒易得之
作手卷賦小樂章求好事書其後

吳宮輦路傷行客
繭冰壓雲凝碧色
門前新掃染家隣
借人鋪設殘衣帛
宮花剪綾連院號
覆取翻看成一道
織紋宛轉勅字新
知是初誰六尺誥
城霞失彩宮蘚病
中與海圖上衣領
改顏倖售緣所遭
褪藥玄香洗藍影
青綢易得淚承睫
擊筑楚歌無故業
歌殘求書好事人

異代倘傳誥綾帖

雪中方四隱君訪宿有詩憶鹿田風雨舊遊奉和

并呈吳六贊府

金華入北山空響出靜埵鹿田在其顛肺石來風雨有
客六七人昔遊至其處唯我愁不眠起坐蹴君語謂此
定何聲百感生離緒既非琴與瑟復異砧將杵醉者呼
不應愁者自為苦空櫺怯孤衾展轉如巢樹濕歌散餘
悲以足拊柱礎爾來又七年欲至困羈旅傳聞老桑門

已復蟬蛻去入山惡少年巾鉢空其聚乃知人世間何
者為客主而我同懷人忽復異處所夢中遙相望各抱
不售賈有客不同遊亦是同懷者地至況有期輿馬不
待假倘規宿山中畸人不應舍

送袁太初歸剡原袁來杭宿傳法寺寺在德壽宮
北今行路及園即宮舊址

大雷山下鄞江口石濕落星海涵斗莓苔鎖窗居鬼神
散髮天衣夜行酒百年綺語墮凡塵劉公不還謝公走

祇今零落三秋霜猶說先朝人物藪道逢袁家美年少
欲挽吳潮歸兩袖自言學出戴君門又說舒君忘年友
舒君白頭爪塵垢戴君業成衣露肘君來何處覓知音
弔古淒涼無老叟出門擇語歸計餐顧忌慚皇無不有
不如歸食空江槎初生淡菜如珠母風帆送客來夷洲
白帟青衫談不朽君不見君今宿寺多鄧僧耆舊能言
幾人在隔牆食柏秋麝過廢石坡陀舊南內


擬古寄何大卿三首

雄雌雙碧雞所食琪樹_之鷄來棲藥洞中當春怕乳子其
雌秋別時守此唯雄耳可憐銜子歸萬里渡海水

石間道人影見者恒髣髴浮雲過到仙與語呼之出身
亦竟不出影亦竟不沒含涕謝仙人天地此終畢

山人食木實竹實以飼鳳聞此來空烟三載脫塵鞅不
見玉笙音唯聞溪鳥弄西臺憶故人野祭忽如夢仰視
浮雲馳不覺哭之慟

宋詩鈔卷九十九



總校官庶吉士臣張能照
校對官助教臣金學詩
膳錄監生臣江長鎰